

Fundacion Adopt an Addict no ta mira un solucion lihe pa adictonan cu a “dropout”

ORANJESTAD - Fundacion Adopt an Addict ta sigui cu su empeño pa yuda rehabilita e adictonan cayehero, y saca nan for di e problematica di droga. Vice-presidente di e fundacion aki, sr. Frank Tieleman a bisa cu actualmente nan tin un total di 13 cliente den nan halfwayhome “Cas Speransa” na Moko. Practicamente e cas aki ta den su capacidad maximo; y di otro banda tin un grupito di adictonan den proceso di rehabilitacion cu ta na Santo Domingo, nan ta seis cliente cu ta preparando pa bin bek. El a bisa cu no tur di e grupo di seis adicto a caba cu nan proceso di rehabilitacion, ya cu tin algun di

nan cu no por a wanta full e proceso, y nan ta “dropout” manera ta ser bisa. Pa e hendenan ey lastimamente Fundacion Adopt an Addict, no ta ekipa pa maneha nan.

Sr. Tieleman a declara na **BON DIA Aruba**, cu e Fundacion Adopt an Addict ta yuda pa ubica e clientenan aki p.e den Centro Colorado of Centro Dakota, pues unda nan por; pero di otro banda e clientenan mester kier rehabilita di su problema di adiccion di droga.

El a splica cu nan centro, esta “Cas Speransa” ta mas tanto ora cu un persona a caba full e proceso, y nan ta percura pa prepara nan pa resocialisa.



Vice-presidente di Fundacion Adopt an Addict, sr. Frank Tieleman.

Sinembargo di e hendenan cu ta ser manda pa Santo Domingo, nan ta keda haya un grupo cu no ta termina e programa; y esey ta keda un inquietud pa nan tambe como fundacion, ya cu nan no ta mira un solucion lihe pa e adictonan aki. Sr. Tieleman a declara cu Gobierno ta yudando e fundacion cu e terapia di e clientenan, ora cu nan ta manda e adictonan pa Santo Domingo. Pero unabes cu e hendenan aki ta bek den nan halfwayhome, pues nan no ta hayando subsidio for di Gobierno. “Cas Speransa” ta draai full riba fondonan cu e fundacion Adopt an Addict ta haya como donacion. □